

## HIBRU DILAG NAI

### *KAYAK NUG BEKA ODEPA NAI AUM*

<sup>1</sup> Kayak Nug haen tatam amu ig memetankad dilagpa nai haen kuḍum ib laalapa ele propet odelagpa aawo beum <sup>2</sup> amge Nug gemu, gog tak haen imupa amu, Nug Beḱa odepa ihinignu nai maṭiom. Kayak Nug Beḱa amu nuhig keeke oh aokunu aum, nuhigpa amu Nug keeke oh ele haṭom. <sup>3</sup> Kayak Beḱa amu Nug Kayaknu amahlak bianab dayaya, Nug Mameg daaṭe amubianab daaṭe. Nug keeke oh nuhig naipa gagatag aqaṭe. Nug mauhom, amupa danab dilag hipunin uhuqa maṭa malowa, Nug edua hab aṭan ta, Nug Kayak, onig binag ele, Nug epeg nadiappa, amuam anuqak aben, amupa daaṭe.

### *KAYAK BEKA NUG ENGEL EDATOM*

<sup>4</sup> Engel ag am onilag ele, amu Jesus ele onig ele amge Nug onig amu engel onilag huana edidte, amubia Jesus Nug engel edadte. <sup>5</sup> Kayak Nug engel dilag inam iinab aum. “Na am da beḱal, gemu da na Mamen bemi.” Iiṭa. Laa amu Kayak Nug engel laipu laa nuhignu, “Da nug Mameg daakul, nug am da beḱal daaku,” ii aum amunu ig nai amupa Jesus Nug engel edadte anidtem. <sup>6</sup> Laa ele amu Kayak Nug beḱa tatamnu wanpa meeb uḍikunu haaha, Nug inam ele aum. “Kayaknu engel oh ag Nug binag meig!” awa aum. <sup>7</sup> Kayak Nug engel dilagnu madikunu ha, Nug inam aum. “Nug he, engel ag ulah bia daaṭeb. Nug he, nuhig

udat danab amu ag ab ditiak gaka<sub>da</sub>k bia daate<sub>b</sub>.”  
<sup>8</sup> Amge Kayak Nug Be<sub>ka</sub>nu amu inam aum. “O Kayak, nahip do ma<sub>do</sub>d am hanhan daa<sub>ku</sub>, iita ii mema. Na hanhan nahip kobol tutu<sub>ku</sub>paib danab ah nahipad gumad<sub>tem</sub>. <sup>9</sup> Amu na kobol tutu<sub>ku</sub>nu oot daate, kobol tutu<sub>ku</sub> iita amu na amunu na ootpa nau, ninig ele doo<sub>tem</sub> amunu Kayak, Nug am nahip Kayak, Nug na tituanita, Nug oo gamag ahak, binan ele, na laipad oh dilag edi<sub>tak</sub>, na metom.” <sup>10</sup> Kayak Nug baula ele Nug Be<sub>ka</sub> amegpa inam aum. “Nadi, anukanab na wan imu heme amu gagatag daate. Na hab ele na epenpa heme. <sup>11</sup> Hab wan ele iita me<sub>ku</sub>lah amge na am bauklel daa<sub>ku</sub>t. Hab wan ele a oh amu lamen alag me<sub>te</sub> amubia alag me<sub>ku</sub>lah amge na anam ii hemana. <sup>12</sup> Geha na danab lamem mapite<sub>b</sub> bia hat<sub>ku</sub>t. Amu geha na danab lamem baolin, laa me<sub>te</sub>b bia hat<sub>ku</sub>t amge na amu hanhan idu laipu anamib daa<sub>ku</sub>t, na ii baoli<sub>tem</sub> amu na nahip gog tak haen ele iita.” <sup>13</sup> Kayak Nug Be<sub>ka</sub> amegpa anam aum amge Nug anu<sub>ka</sub> engel nuhig laa amegpa inam laa iinab aum. “Na da epel nadiappa, amuam anu<sub>qak</sub> aben, amupa daappe, dimpa da nahip keked na waatpa maadpi daaglag.” Iita, Nug Jesus amegpa aa<sub>ku</sub>ib amu aum. <sup>14</sup> Nug engel laa amegpa anam ii aum. Iita! Engel ag am ou<sub>di</sub>, ag am Kayaknu udat hete<sub>b</sub>. Kayak Nug ag gona, danab Nug edua dii<sub>ku</sub>nu dab me<sub>te</sub> ele amu, ag ehanad<sub>ku</sub>lagnu maate got<sub>eb</sub>.

## 2

*KAYAKNU EDUA DIIAK AM KEEKE OKAINAB*

1 Kristus Nug onig binag okai ele amu awom daate, Nug Kayak nai ipunikom, diig amunu amu ig Nai Ena ig edigmanu, ig nai doomut ele, nai amu ig adat, dab meta autanab aot, dim lamidtu! 2 Anuka Kayak Nug engel odelagpa do nai aawo be, nai amu gagatag daatom. Danab ag tapaeg ne di metona amu ag nob nau, ahilag ehed hak elelepa aodpig. 3 Aria gemu amu Kayak Nug ig edua awigkunu ib babaitom, udat nadi nuhig aaku daate amunu ig Kayaknu udat amu di metagnig dayeb amu ig ehed hak ihinignu nob naunu dekadta oolta gokunignu elelete? Iita! Ig elele iitanab. Nadi Jesus Nug nuka, edua awikak amunu amu Nug tatam a, danab ag Nug odepa aawo doopig ele ag ig amenigpa nai amunu am genabnab ipunigpig. 4 Kayak Nug eponak keeke, danab hekunu elele iita diigdiigpa nai amu gagatag qetom amu Nug nuhig Oudinuhig ehah diigdiig ele, Nug oo niinom bia, danab matom.

### *JESUS NUG IG EDUA AWIKAK DANAB ANUQAK*

5 Aria ig gemu wan laa, buti adi bekunu atem amu, Kayak Nug engel ag amu gumaglagnu laa ii maatom. Iita. Nug nuhikud danab ag gumaglagnu maatom. 6 Kayak naipa, laa nug amunu inam yom. “Danab am adi keeke amunu na ag udat amu hekulagnu dab metem? Danab bekalkad am adi keeke amunu na binalag anam madatem? 7 Haen tutunuib na engel waalagpa maadme amge na binalag matan, gagatag ele matame.

8 Amu na keeke oh ag waalagpa maate, ag gumadkulagnu daateb.” Yo, Kayak Nug keeke oh danab waalagpa meum, Nug keeke laipu laa ii

uuit<sub>om</sub> daate amge gemu ig anid<sub>tem</sub>, danab ag keeke oh ii gumad<sub>teb</sub>. <sup>9</sup> Amge ig Jesus anid<sub>tem</sub>. Kayak he, Nug Nug onig okainab uua, Nug engel onilag okai, onig amubia ii ada, onig nakok bia ada dayaya, ig danab ig ehanig<sub>kunu</sub> mauhom amunu Kayak Nug humita, binag onig okai ele met<sub>om</sub>. Kayak Nug ig danab ig ehanit<sub>ak</sub> okai hamu megak<sub>kunu</sub> dab maama he, Jesus Nug ihinignu mauhom.

<sup>10</sup> Kayak, Nug keeke oh diig, keeke oh Nug hat<sub>om</sub> ele, amu Nug bekod kudum oh diia, atan teeb, ena binalag ele daaglagnu dab maama, Nug Jesus Nug guit<sub>ak</sub> doyaya, ib amupa Nug edua diiaknu anuqak danab elelenab ba daak<sub>kunu</sub> aum. Amupa Kayak Nug kobol elelenab heum. <sup>11</sup> Laa amu Jesus Nug he, danab opia awak bet<sub>eb</sub>. Amu danab opia awak bet<sub>eb</sub> ele, ag Nug ele oh am Mamelag laipu waapa daateb amunu Jesus Nug amu dilagnu “Da lailad,” akunu Nug uda ii nete. <sup>12</sup> Amuam Nug ate amubia. Nug inam ate. “Kayak, da geha nahipnu da lailad amelagpa madipi dooglag amu da geha qag mak nadi noolagpa na binan mekulnu ahi edakul.” <sup>13</sup> Nug baula ele inam ate. “Da nuhignu oolpa genab dookul.” Nug laa ele inam ate. “Aria, da iiku nid naunau, Kayak Nug da medom ele amu, da ag ele daatem,” awa ate.

### *JESUS DANAB BEDU AWA BA, DANAB AH EHANATOM*

<sup>14-15</sup> Nid naunau amu ag anilkad mamelkad ag bedulag bia bedulag aon oiteb amunu Jesus Nug Satannu gagatag, gagatag amupa nug he, danab mauhte<sub>b</sub> ele amu, Nug gagatag amu heeb iita mekunu, Nug danab ag wan imupan

oiyak ahilagpa haen oh mauhaknu badak doon, ag amupa hipalak daapig ele amu, ag amunu uhuqak ele madakunu, Nug ele danab beđu awa, Nug mauhom. <sup>16</sup> Genabnab Nug engel ehanadkunu udat ii heum. Iita. Nug Abraham budupud ehanatom. <sup>17</sup> Amunu, diig amunu, Nug mana metak danab dilag iki, Nug oo gai iita ele doote daakunu, Nug udat nuhig amu pehetak ha Kayak medakunu, Nug danab dilag hipunin uhuqa madakunu elele daakunu amu Nug ib ohpa Nug laikud bia bekununab dayom. <sup>18</sup> Amu Nug nuka hipunin hekunu eedak doyaya, ug mawom amunu Nug danab ag hipunin hekulagnu eedak dooteb ele amu, Nug ag ehanadkunu elele.

### 3

#### *JESUS NUG MOSES EDIDTE*

<sup>1</sup> Amunu ag Kayak baegpan danab, ag am ig lainkad, Nug ag hab atan daaglagnu tituanatom ele, ag Kristus Jesus, Nug am ihinig oopa genab doyaknu mana metak danab dilag iki, Nug am ihinig oopa genab doyaknu total danab daate ele amu, ag nuhignu atog nona dab mena autna aweg! <sup>2</sup> Kayak Nug udat amupa meum amu Nug Kayak ode genab dim lamita heum. Amu Nug anuka Moses Kayaknu danab oolagpa Kayak ode tutuku dim lamita, udat heum bia heum. <sup>3</sup> Amge Kayak Nug Jesus onig okai, Moses onig editak ele, onig amu metom. Adinu? Jesus Nug am lag hak danab bia dayeye, Moses nug am lag ebehi bia dayom amu danab nug lag hete amu nug onig, lag onig editak daate, amubia Jesus onig am Moses onig

edidte. <sup>4</sup> Amu lag oh am danab heeg daateb amge keeke ohnu hak diig am Kayak. <sup>5</sup> Moses nug am Kayaknu tamaniak oopa udat danab dayaya, Kayak ode genab dim lamiṭa, dimpa keeke beḱunu amu Kayak odepanu awa maditom. <sup>6</sup> Amge Kristus Nug am Kayak Beḱanab, Nug Kayaknu danab dilag iki dayaya gumadte. Nug genab Kayak ode dim lamiṭa udat hete amunu ig hanhan ig ihinig oopa genab doyakpa ehanitak aognignu dab meḱunig dayeb, ig oonig gamag ahebeb, Nadi ameg ele meḱunig dayeb amu ig aaku nuhig danabnab daagnig.

#### *OOṔA GENAB II DOYAK KOBOL AIB DAYOM*

<sup>7</sup> Amunu ig Kayak Oudi, Nug ode doognig. Nug ate. “Gemu ag Kayak ode doon <sup>8</sup> amu ag anuka danab ag hib guita hena, dahil nai tapaeg neum amubia aib hepeg oolag ituom. Haen amu ag atu tadakpa daanna, ag da adi heḱulnu ami amu genab heḱulte, o iita iite heḱul amu anidḱulagnu eedilpig. Haen amupa ag oolag kel dopig. <sup>9</sup> Aben amupa, ag gemu daateb amu, ag alalkad, ag da mad 40 anam keeke oh heiyi anidpig amge ag hamu bia doona, anam eedilpig. <sup>10</sup> Amunu da danab amu dilagnu opodil be inam ami. ‘Danab imu ag haen oh dahil ib amu apididteb. Ag dahil kobol ena amupa elele ii oiteb.’ <sup>11</sup> Da opodil be, nai dahil gagatag qeten inam ami. ‘Ag hik awak dahil iinab aomna!’ ” Kayak Oudi Nug anam aum. <sup>12</sup> O lailad, ag lailag laa ag oolagpanu nug dab mak nau, amu oopa genab doyak ele iita, amubia oiyaya, Kayak bauklel di metamanu, ag dab mena autna aweg! <sup>13</sup> Ag Kayak ii di metamna. Iita.

Ag gemu haen imupa Nug baag dooglagnu elele daateb amunu Nug haen imunu, “Gemu,” awa ate, amunu ag haen imupa ded ohpa ehed hak kobol laa ag oolag bubuiteb, ag gagatag getamnanu amu ag ag lailkad Nai Ena amelagpa matinna, dab mak ahilag mad ateg! <sup>14</sup> Adinu? Ig Kristus ele tamanit, laipu daagnignu ib am laipuib. Laa iita. Ib amuam inam. Ig tatam Kristusnu oonigpa genab doomut amu, ig amuib adaput ukeb, mauhak haen ihinigpa ele oopa genab doyak nuhignu amu aakuib adagnig dayeb amu amupa ig genab Kristus ele tamanit daatem. <sup>15</sup> Amuam nai ig geha iiku anidmut amubia. Nai amuam inam. “Gemu ag Kayak ode doona amu ag anuka danab ag hib guita hena, Kayak ode tapaeg neum ele, amubia aib hepeg oolag ituom.” <sup>16</sup> Anuka aun adi ag Kayak ode doona, hibguita hena, nai nuhig tapaeg neum? Amuam danab oh Moses nug omalate, Igipta uun, ahan gopig ele. Ag kobol amu hepig. <sup>17</sup> Kayak Nug mad 40 haen amu ohpa aun adi dilagnu opodi bak doyom? Nug danab ag hipunin qenana, mauhna atu tadakpa niipig ele, ahilagnu opodi bak doyom. <sup>18</sup> Amu Kayak Nug aun adi dilagnu genabnab nuhig hik awak ii aoglagnu aum? Nug danab ag nuhig nai tapaeg neum ele, amu dilagnu aum <sup>19</sup> amunu ig anidta dootem, ag oolagpa genab ii doopig amunu ag Kayaknu hik awaknu abenpa wakulagnu elele iita.

## 4

### *KAYAKNU DANAB AH DILAG HIK AWAK*

<sup>1</sup> Aria Kayak Nug tatam nai qaka aum daate. Nug inam aum. “Ag dahil hik awak aoglagnu elele daateb,” amunu danab laa ag oolagpanu nug hik awak amu eta ii aomanu amu ig dab meta auta aotu! <sup>2</sup> Adinu? Ig anuka Israel ag Nai Ena doopig bia, ig ele doomut amge ag am hamu bia doonna, ag oolagpa genab ii doopig amunu Nai Ena ag doopig ele amu, ii ehanatom. <sup>3</sup> Aria ig Jesusnu oonigpa genab doomut ele amu, ig amunu Kayak aum bia aaku Kayaknu hik awak aotem amge laa ag oolagpa genab ii dooteb ele, Kayak Nug ahilagnu inam aum. “Da opodil be, nai dahil gagatag qeten inam ami. ‘Ag hik awak dahil iinab aomna!’ ” Nug hik awak aben amu ii babaitom amunu ag ii aopig, anam iita. Nug hik awak aben amu matu dig mak haenpa babaitom daate. Ag oolagpa genab ii doopig amunu ag ii aopig. <sup>4</sup> Amu Kayak naipa nai laapa Kayak Nug ded eblaih aditnu inam ate. “Kayak Nug udat nuhig oh ha malowa amu Nug ded eblaih aditpa hik awom.” <sup>5</sup> Aria Kayak Nug hik awak laa, danab ag hik aoglagnu babaita malom. Nug ele ded eblaih aditpa hik awom amge Israel dilagnu Nug inam ate. “Ag dahil hik awak iinab aomna,” <sup>6</sup> amunu ig anidtem, danab ag hik aoglagnu daateb amge danab ag anuka Nai Ena doona, tapaeg neum ele, ag oolagpa genab ii doopig amu, ag ii aopig amge hik awak amu babaitom daate amunu laa ag aoglag. <sup>7</sup> Amunu Kayak Nug ded baula, ded amuam onig, “Gemu,” meum. Tatam meum, dimpa mad kudum laa uue, Kayak Nug Dawit odepa nai tatam anak daate amubia aawo beum.



Nai amuam inam. “Gemu ag Nug ode doon amu ag aib hepeg, oolag ituom.” <sup>8</sup> Amu Josua nug danab amu Kayaknu hik awak maṭalo amu Kayak Nug dimpa ded laanu ii maṭilo <sup>9</sup> amunu Kayak Nug nuhikud danab ag hanhan hik enanag aon daaglagnu hik awak amu babaitom daate. Amuam ded eblaih adit elenu hik awaknab ahilag. <sup>10</sup> Adinu? Aun nug Kayaknu hik awak aote, nug udat nuhig ii hete. Nug hik aote, Kayak Nug hab wan ele ha malowa ded eblaih aditpa hik awom amubia. <sup>11</sup> Amunu ig ele hik awak amu aot daagnignu amu Kayak Nug amunu adi ate amu ig hetu! Ig anuka Israel ag Kayak ode tapaeg neum bia padal mekunignu ii hemata.

<sup>12</sup> Kayak nai am keeke bau, udat haaha daate. Nug am qep laa aeg laih laih ele, udat nuhig enanag hete amu, Kayak nai nug udat nuhigpa qep amubia edidte. Nug keeke qata etaknab daatep am okula aokunu elele. Danab nug dab makpa adi dab mete amu nug oopa adi doote amu Kayak nai keeke amu oh epediadte. <sup>13</sup> Amu keeke laipu laa Kayak Nug amegpa lokumak iinab daate. Iita, keeke oh am Nug amegpa miagib amahlakpa daateb. Amu dimpa ig Nug noobpa daata, ihinig haknu matignig.

### *MANA METAK IKI AMU JESUS*

<sup>14</sup> Anam daate amunu ig oopa genab doyak ihinig, ig heut miag atite ele amu, ig amu adat auta aotu! Adinu? Ig ihinig mana metak danab dilag iki, Nug hab atan teum daate. Nug am Jesus, Kayak Beḱa, Nug daate. <sup>15</sup> Ele amu ihinig mana metak danab dilag iki, Nug am danab laa ihinignu

oo ii dookunu laa iita, hipunin hekunu eedak kobol oh ihinigpa bete amu, amu ele nuhigpa beum amge Nug hipunin laa iinab heum amunu keeke nuhigpa beum bia ihinigpa beebe, ig gai iita bia daautut amu Nug ihinignu oo doyak dookunu eelenab daate. <sup>16</sup> Amunu Kayak Nug ihinignu oo gai iita dookunu, ug haenpa Nug ig ehanitak okai hamu megakunu amu ig ii badaa, Kayak gumita gokunig.

## 5

### *KRISTEN LAA NUG KRISTUS DI METAMANU NAI*

<sup>1</sup> Aria mana metak danab dilag iki tituanaknu kobol amu inam. Kayak Nug danab oh oolagpanu danab laa, nug danab ah odelag awa, Kayak amegpa akunu, Kayaknu udat ele hekunu, tituana mete. Danab amunu udat am nug Kayak do medakunu, amu Kayak Nug danab ah dilag hipunin uhuqa madakunu, nug dod ele mana, Kayak medakunu daate. <sup>2</sup> Nug ele hipunin hekunu eedak aote amunu nug danab ag ootot daateb, ag ib apididteb ele amu, nug oo bodo etakpa atog noadkunu elele daate. <sup>3</sup> Amu mana metak danab amu, nug ele hipunin hekunu eedak aote, hipunin danab ele daate amunu Kayak Nug danab amu, nuhig hipunin uhuqa medakunu, danab laa oh dilag hipunin ele uhuqa madakunu, mana metak danab amu nug dod mana, Kayak medate.

<sup>4</sup> Aria mana metak udat amuam binag ele, amu danab laa nug nukā nug nuhig dab makpa nug binag amu awa, udat amu hekunu ii hema. Iita! Kayak Nug tatam, anukā Aron udat amu hekunu onigpa eum amubia, Nug danab udat amu maokunu, danab amu onigpa ete. <sup>5</sup> Amu Kristus

Nug ele am anam. Nug nuḱa binag amu awa, mana meṭak danab dilag iḱi ii beum. Iiṭa! Kayak amegpa aum. “Na amu da beḱal. Gemu da na Mamen bemi daaṭem,” awa aum. <sup>6</sup> Kayak naipa aben laapa amu Nug inam ele aum. “Na am Melkisedek bia, mana meṭak danab hanhannu daaṭem,” awa aum.

<sup>7</sup> Aria anuḱa Jesus Nug danab beḱu awa, wanpa dayom, haen amupa Nug Kayak unuqitata, Nug ele Kayak keeke laala heḱunu oḱ meṭom. Nug mauhowa, ib laapa eḱua hipaidḱunu elele iṭa, Kayak Nug anam ehanidḱunu elele dayom amunu Jesus Nug Kayak amu heḱunu gagatag oḱ medata, ameg leb ne, Nug nuḱa binag qe ne, Kayak ode dim lamitom amunu Kayak Nug nuhig oḱ mak amu odepa awom. <sup>8</sup> Jesus Nug am Kayak Beḱanab amge Nug ug mawa, Kayaknu nai dim lamita mauhom, amupa Nug ipunitak awa auta awom. <sup>9</sup> Jesus Nug ug amu oh mawom amupa Nug mana meṭak iḱi daaḱunu elelenab meṭom amunu Nug danab oh nuhig nai dim lamidṭeb ele am ehanata, eḱua diie, ag hanhan ena daaglagnu diig daate. <sup>10</sup> Nug anam dayeye, Kayak tituana aum. “Na am Melkisedek bia, mana meṭak danab dilag iḱi daaḱut,” awa aum.

<sup>11</sup> Aria Melkisedeknu nai amu unuqagnab, ig nota aput, ag nai imu aoteb ele amu, ag dooglagnu ana daate amge ag oolag ootot ele daateb, ag paha oolag maidḱunu elele iṭa amunu ig aput dooglagnu amu ig udat naḱi heta, nai diignab aput dooglag. <sup>12</sup> Ag ipunitak danab bena daaglagnu haen elelenab dayom amge iṭa, ag doyak ahilag qaḱub amunu laa nug ag Kayak nainu diig eḱua ipuanateb aoglagnu daateb. Ag

am e gagatag lakulagnu amu elele iita, ag huhib lanana daaglagnu elele. <sup>13</sup> Ig dootem, danab oh ag huhib lateb ele, ag am nid yud daateb. Amu ag kobol tutuku iinab dooteb. <sup>14</sup> Amge e gagatag am danab kalulag ele, ahilagnu daate. Danab anam amu ahilag dab mak am okai meum, ag dab mak elele aon oiteb amunu ag kobol ena, nau ele epedin dooglagnu elele.

## 6

### *KAYAK ADI AUM AM GENAB HEKU*

<sup>1</sup> Amunu ig Kristusnu nai dig makpan baubau haen oh ii matimta. Ig danab kalu ele ma nai madite, amubia daagnignu hetu! Amu ig dig maknu nai, amuam ig oonig edueb, kobol nau oh genab iita ele di metagnignu nai, ig Kayaknu oonigpa genab doognignu nai, <sup>2</sup> layatak diigdi-ignu nai, epeg danab badepa maknu nai, Kayak Nug mauhak danab mad eteb edua hibaitaknu nai, Kayak Nug danab ah oh ag epediateb, ag hanhan nob ena o iita nob nau aon daaglagnu nai ele amu, ig nai amuib ii matimta. <sup>3</sup> Iita! Kayak Nug ig ehanikeb, ig nai unuqag daate ele, amunu matignig.

<sup>4</sup> Adinu? Danab ag Kayak Nai Ena aopig, ag matu hab atannu do ena aon oolagpa mepig, ag Kayak Oudi ele aopig, <sup>5</sup> ag Kayaknu nai doona, enanag anana, Kayaknu haen ena dimpa ahilagpa bekunu ele doopig amu, <sup>6</sup> danab amu ag nena gena, Kayak di metaglag dayeb amu, ag anam henana, ag oolag edueb, Kayak topa wakulagnu ib laa iita. Adinu? Ag kobol amupa Kayak Beka baula ad emaitakpa

atulna, ag Nug ad emaitakpa danab ag nuhignu u<sub>da</sub> laaitak nai akulagnu aih<sub>te</sub>b.

<sup>7</sup> Am imubia. Haen kud<sub>um</sub> gu wanpa ne, wan nug lepu amu awa, danab ehanate, e ebapig ele am ena bete amunu Kayak Nug wan amu ititak ena medate. <sup>8</sup> amge wan laa ud nau diigdiig amupa bete<sub>b</sub>, wan amu udat ena ii hete amu wan amu nug ititak nau waapa daak<sub>unu</sub> miagnab daate. Danab ag maiglagnu daate.

<sup>9</sup> O lailad, genab gemu ig nai ug ele amu ag dooglagnu madit<sub>em</sub> amge ig genab doot<sub>em</sub>, ag padal mak anam bia ii aomna. Iita! Kayak Nug edua diiom amupa ag ehanitak aote<sub>b</sub>. <sup>10</sup> Kayak Nug epediak ehed <sub>laa</sub> ii hete amunu ag udat nuhig hepig, ag nuhignu oolag mauhte dab menana, nuhikud danab ehanadp<sub>ig</sub>, gemu ele anam hete<sub>b</sub> amu Nug amu oh daug ii atima. <sup>11</sup> Amu ag dimpa gogtak haenpa adi adi aoglagnu dab mete<sub>b</sub> ele amu, ag amuib aoglagnu elele daaglagnu, ig ag udat ahilag gemu ena hete<sub>b</sub> amu ag anamib hepeg uke<sub>b</sub>, gogtak haenpa malaglagnu oonig daate. <sup>12</sup> Ig ag paha oolag bahi yak dooglagnu oonig ii daate. Iita. Ag danab ag oolagpa genab doona, oolag bahi ii ye, Kayak epegpa ehanitak aote<sub>b</sub> ele amu, ag amu ahilag kobol dim lamidna, ag keeke oh anuka Kayak Nug bekod ele mada<sub>kunu</sub> nai qaka aum amu aoglagnu oonig daate.

<sup>13</sup> Aria anuka haen Kayak Abraham amegpa keeke hek<sub>unu</sub> nai qaka aum amu, danab laa nug Kayak editak laa iita amunu Kayak Nug, Nug onigpa nai nuhig gagatag qeta aum. <sup>14</sup> Nug inam aum. “Da genabnab atem, da ititak nadi medete hepi, na budun ag apatna, kudum daaglag,” awa

aum. <sup>15</sup> Amunu Abraham nug oo makpaib, bahi yak ele iitapa nai amu ameg ma dayaya, keeke oh anuka Kayak medakunu nai qaka aum amu aaku awom.

<sup>16</sup> Aria, nai gagatag qetaknu kobol am inam. Danab nug nai nuhig danab laa onigpa gagatag qedte. Danab laa am laa, nai gagatag qedte ele amu, nug editak amunu danab laa nug layagnu nai amu nuhig nai edidmanu amu nug laa onig awa, atan ma, nuhig nai onig amupa gagatag qedata, layagnu nai okulte. <sup>17</sup> Anuka Kayak Nug ig Nug bekod ehanigkunu nai qaka aum, Nug nai amu iinab baolimanu ipunika auta aokunu amu, Nug nai nuhig Nug onigpa gagatag qetom. <sup>18</sup> Aria gemu am keeke adit, laa am Kayak Nug keeke genab hekunu nai qaka aum, laa am Nug nuhig nai, Nug onigpa gagatag qetom, keeke adit amuam baoliglahnu elele iita amu, Kayak Nug keeke adit amunu hamu bia ii doyata, Nug keeke adit amu uuata, keeke laa hekunu elele iita, amupa ig danab ig Kayak noobpa ena daatem ele amu, ig oonig genab gagatag qedtem. Amunu Kayak Nug ig gog tak haenpa bauklel mekeb aognignu ameg mekunignu aum amu ig elele dootta, ameg metem. <sup>19</sup> Amu gog tak haenpa ig genab bauklel aognig, dab mak amuam ig dab mak diigdiig dim lamidmatanu, ub mameg nug ubnu keeke ug ele, onig anga, eum daate amubia adaike daatem. Ihinig ehanitak amuam keeke genab, hab atannu mana metak lag oo gun elepanu udite. <sup>20</sup> Amu mana metak danab ag danab ehanadkulagnu dod main Kayak medateb amubia Jesus Nug tatam lag oo amupa, Nug nuka Nug bedu Kayak meteb, ig

ehanigkunu noum. Nug am mana metak danab dilag iki, Melkisedek bia hanhan beum daate.

## 7

### *MELKISEDEK NUG AM MANA METAK DANAB ONIG ELE*

<sup>1</sup> Melkisedek nug am Salemnu king amu nug am Kayak atannabnu mana metak danab. Anuka Abraham nug ban ha, king aqowa, edua apagpa ugeke, Melkisedek nug Abraham ele ibpa nug uda teya, ititak metom. <sup>2</sup> Mete amu Abraham nug keeke nuhig opate, ameg eblaih tanig ele neeg, ameg laa Melkisedek metom. Melkisedek onig, nuhig mehuqak am, “Kobol tutukunu gumak danab.” Melkisedek nug am Salemnu gumak danab. Salemnu diig am, “Madodnu gumak danab.” <sup>3</sup> Kayak nai am nug anig mameg amu nug mametab ele ii ipunigte. Menuak ded nuhig amu mauhak ded nuhig ele ii ipunigte. Nug am Kayak Beka bianab daate. Nug am mana metak iki hanhannu daate.

<sup>4</sup> Aria Melkisedek nug am danab onig okai ele amu, ag anteg! Nug am onig okai iita ele daalo amu Abraham nug ban ha, keeke awom amu ameg laipu nug ii metalo amge anam iita. Nug ameg laipu metom. <sup>5</sup> Amu Jakop beka Lewi budub oopanu laala ag mana metaknu udat aoteb ele amu, do ag keeke ameg eblaih tanig ele oopanu laipu, Israel dilagpanu aoglagnu ate. Amu Israel laa oh ag am budub amunuib, ag lailkadnab, ag oh am Abraham budub daateb amge do nug ag mana metak danab keeke ameg laipu mataglagnu ate. <sup>6</sup> Melkisedek nug am Lewi budub oopanu iita amge

nug Abrahamnu keeke ameg laipu awowa, nug danab, Kayak nug amegpa keeke laa heeb bekunu nai qaka aum ele amu, nug ititak metom. <sup>7</sup> Aria ig dootem, danab nug ititak medte ele amu nug am okai, onig ele. Nug laa ititak aote ele amu, nug edidte. <sup>8</sup> Am gemu Lewi budub, ag am danab mauhteb ele amu, ag keeke ameg laipu aoteb amge Melkisedek, Nai Ena ate amubia, nug bau daate ele, nug keeke ameg laipu amu awom. <sup>9</sup> Amunu ig inam akunignu elele. Lewi nug gemu keeke ameg laipu aote amge Melkisedek, nug anuka keeke ameg laipu Abraham epegpanu awom, amunu nug aaku Lewi epegpanu keeke ameg laipu ele awom bia daate. <sup>10</sup> Adinu? Melkisedek nug Abraham ibpa ante, Abraham nug keeke ameg laipu metom. Amu Abraham nug am Lewi memetab amunu Lewi nug bedupa aaku dayom.

### *JESUS AMU MANA METAK DANAB HANHANNU, MELKISEDEK BIA*

<sup>11</sup> Aria, Lewi budub ag ahilag udatpa Israel danab ehanadpeg, Israel danab ag do waapa elele daaglagnu daapig amge udat ahilag amu heeb, danab ag eledenab bena daalob amu adinu mana metaknu danab laa, Aron bia iita, Nug am Melkisedek bia, bekunu dayom? <sup>12</sup> Aria do nug Lewi budub oopanu ag mana metak danab daaglagnu ate amunu budub laa oopanu laa nug mana metak ba daakunu dayeb amu Kayak Nug do ele baoliku. <sup>13</sup> Amu danab imu, Kayak Nug Nug amegpa, “Na am hanhan mana metak danab Melkisedek bia daatem,” aum ele amu, Nug am budub laapan, budub amupa amu danab laipu laa



anuka qadabpa mana metaknu udat laa ii heum. <sup>14</sup> Amu ig doot auta aotem. Ihinig Nadi, Nug Juda budubpa doum. Amu Moses nug budub amupanu mana metaknu udat danab laa bekunu amu nug laa ii aum. <sup>15</sup> Aria nai imu diig amu miag atiaknab daye, ig anidta dootem. Mana metaknu danab laa nug beum amu Melkisedek bianab daate. <sup>16</sup> Laa nug do laapa, o iita aun tiigpa, o iita aun budubpa he, Nadi Nug mana metaknu danab ii beum daate. Iita! Nug bauklel hanhan dayaknu, gogtak nuhig iita ele, gagatag amunupa mana metaknu danab beum daate. <sup>17</sup> Am Kayak naipa nuhignu yak daate amubia. Nai amuam inam. “Na am mana metak danab, Melkisedek bia, hanhan daatem.”

<sup>18</sup> Kayak Nug do anukanu amu qe, iita meum. <sup>19</sup> Adinu? Do amu nug ebehi iita, nug ig ehanigkunu ele elele iita. Do nug am ebehi iita amunu nug keeke laa he, tutuku elelenab iinab beum amge Kayak Nug ib laa odom. Ib amu nug do editak, enanag. Amu ib amupa ig Kayak topa wakunignu elele daatem.

<sup>20</sup> Aria Kayak Nug Jesus Nug mana metak danab daakunu hamu ii tituanom daate. Iita! Nug nuka Nug onigpa nuhig nai gagatag qeta anana tituanom. <sup>21</sup> Mana metak danab anuka ag am anamnab iita. Auntai laa nug onigpa nuhig nai gagatag qeta anana he, mana metak danab bepig? Laa iita amge Jesus nuhignu aakuib Kayak Nug nuka Nug onigpa nuhig nai gagatag qeta, mana metak danab daakunu a, Nug beum daate. Kayak Jesusnu aum. “Nadi Nug nuka Nug onigpa nuhig nai gagatag qeta, ‘Na amu mana metak danab

hanhannu daatem,' aum amu Nug dab mak nuhig iinab baolima." <sup>22</sup> Kayak Nug Jesus mana metak danab daakunu, nuhig nai gagatag qeta aum, laa ag anuka mana metak danab daapig, ahilagnu anam ii aum, diig amunu ig dimpa tituanak nai bau, ig nob ena adi adi aognignu ate amu, ig genab aognignu dootem. <sup>23</sup> Aria anuka am mana metak danab kudum daapig. Adinu? Ag am danabib, ag mauhadpig amunu ag hanhan anamib daaglagnu elele iita. <sup>24</sup> Amge Jesus Nug am hanhan bauklel daate amunu Nug mana metaknu udat hanhan heku. Baoliak laa iita. Udat amuam danab laa epegpa iinab wama <sup>25</sup> amunu Nug bauklel dayaya, Nug Kayak danab ehanadkunu hanhan unuqidte amunu diig amunu Nug danab, ag Nug onigpa Kayak gukuidna wateb ele amu, Nug ag edua diieb, bauklel hanhan daaglagnu elele.

<sup>26</sup> Mana metak danab dilag iki anam amu ig ehanigkunu daakunu am enanag. Nug am opia awak, ehed hak kobol laa Nug bedupa iinab daate. Nug am dubutid iita, hipunin danab bia ele iita. Nug onig atannab teum daate. <sup>27</sup> Jesus Nug am mana metak danab anukanu, ag ded oh dod main, Kayak Nug hipunin ahilag tatam uhuqa matowa, danab dilag ele uhuqa mada-kunu medapig bia ii hete. Nug udat nuhig anam iita. Kayak Nug danab ah dilag hipunin uhuqa mada-kunu amu Jesus Nug amu haen laipu aakuib Nug nuka Nug bedu oh Kayak metom amunu Nug baula ii hema. <sup>28</sup> Amu do tatamnu am danab gai iita tituanate, ag mana metak danab dilag iki daateb amge nai Kayak Nug nuka Nug onigpa gagatag qeta aum, do nai dayeye dimpa beum ele amu, nai amupa Kayak Nug beka

tituanom. Kayak Nug he, Nug Bekā amu Nug mana metak danab dilag iki daakunu elelenab ba amu Nug hanhan anamib daate.

## 8

### *JESUS NUG HAB ATAN APA UDAT HETE*

<sup>1</sup> Aria, nai ig ațem ele, nuhig diig am inam. Ig mana metak danab dilag iki Melkisedek bia ele, Nug am matu hab atan Kayak Binag Ele epeg nadiappa, amuam anuqak aben, amupa hedep neum daate. <sup>2</sup> Nug am mana metak udat, Kayaknu mana metak lag, aben opia awaknab ele, amupa hete. Aben amuam, mana metak lag genab, amupa daate. Danab laa lag amu ii heum. Iita! Nadi nuka lag amu babaitom.

<sup>3</sup> Mana metak danab dilag iki anen anen amu ag ahilag udatpa ag amu mana metak diigdiig Kayak medteb amunu Jesus Nug ele mana metak laa Kayak medakununab dayom. Nuhig mana metak am Nug bedu. <sup>4</sup> Amu Nug wanpa gemu daalo amu Nug mana metak danab laa iinab daalo. Adinu? Mana metaknu danab laala matu bepig daateb, ag mana metak diigdiig Kayak medteb, do niite amubia heteb. Ag udat amu gumateb, laa ele dayaya gumakunu ib ii daate. <sup>5</sup> Mana metak udat, ag wan imupa heteb ele amu, ag hab atan opia awak abenpa kobol niite ele amubianab dotog aaku heteb. Nai laa amu ipunigte am nai anuka Kayak Nug Moses amegpa aum. Nai amuam haen Moses nug mana metak lag dod gadapa hepig ele, lag amu galakunu heehe, Kayak aum. “Na dab mena autna

aona, keeke dotog da qaukopa ipunidmi ele amu, na amu bianab he!” awa aum.

*TITUANAK BAU NUG TITUANAK ALAG EDIDTE*

<sup>6</sup> Amge mana metak danab ag wanpa heteb, ag am hab atannu hak, amunu dotog bia heteb. Jesus Nug mana metak udat awom ele amu, udat amuam mana metak udat alag editom. Nug tituana nai qakak bau amu nug tituana nai qakak alag edidte aumbia Jesusnu mana metak udat am mana metak udat alag edidte. Nug tituana nai qakak baunu diig am ele alagnu diig edidte. Amu ele, nug tituana nai qakak bau diigpa amu keeke Kayak heeb bekulagnu nai qaka aum ele amu ag alag amunu edadte.

<sup>7</sup> Amu nug tituana nai qakak tatamnupa ehed laa ii daalo ele amu, Kayak Nug nug tituana nai qakak baunu ii dab melo. <sup>8</sup> Amge Kayak Nug nug tituana nai qakak alag, nug danab ehanadkunu elele iita, nai laapa ipunika, miag atia aum. Nai amuam inam. “Nadi Nug ate, ‘Doyeg! Dimpa, haen laapa, geha Israel budulkad amu Juda budub ele, da ag oh ele nug tituana nai qakak baupa ag ele nug tituanta, nai qakagnig. <sup>9</sup> Nug tituana nai qakak bau amu da tatam ag memetalkad anuka haen da epelag aden omalati, Igipta wan uun, ahan gopig ele, haen amupa da ag ele nug tituanta nai qakamut amubia iita. Haen amu ag nug tituana nai qakak nai dahil ii dim lamidpig amunu da di matami.’” Nadi anam awa ate. <sup>10</sup> Nadi Nug tudita inam ele aum. “Haen amunu am iita meeb, geha da nug tituana nai qakak baupa Israel ele nug tituanta nai qakagnig. Nug tituana nai qakak amuam inam. Geha da do dahil oh dab mak

ahilagpa mein, da geha ag oolagpa ele mepi daaku. Geha da Kayak ahilag daakul, ag am dahil danab daaglag. <sup>11</sup> Amu geha danab oh ag Kayaknu, nug ipunitak lailkad mudipan dilagpa ii hemana. Iiṭa. Amu lailkad laala ag lailkad laala ele ipuanadnana, ‘Ag Nadi doye!’ ii amana. Adinu? Haen amupa geha danab oh anen anen ag da dooidna autna aoglag. Nid naunau, danab okai okai ele, ag oh da dooidkulag. <sup>12</sup> Da ahilagnu ool gai iṭa doyen, da hipunin ahilag uhuqe maten amu da hipunin ahilag baula dab ii mepa,” awa aum. <sup>13</sup> Nug nug tituana nai qakak baunu anam anana, nug tituana nai qakak tatamnu amu Nug he, alag meum. Amu keeke nug alag ma, nug kaino bia nakoknab dayaya, iṭa mete.

## 9

### *MANA METAK TATAMNU AMU AG DOD TIIGPA HEPIG*

<sup>1</sup> Aria nug tituana nai qakak tatamnupa amu Kayak Nug do laala ele metid haknu amu danab ag epelagpa mana metak lag dod gadapa hena galaglagnu ele meum. <sup>2</sup> Dod gada mana metak lag amu oopa, makulak anuqakpa amu lam, balal amu bret, ag Kayak medapig ele amu, keeke amu oh agupa daapig. Lag oo makulak amuam onig, “Gun Aben.” <sup>3</sup> Aria lag oopa, lamen nadi dimugpa, lag oo makulak laa, makulak amunu ag, “Gunnab Aben,” ateb, amupa dayom. <sup>4</sup> Aben amupa amu ab kah mutudig ele ahakunu qadab golpa hak amu nug tituana nai qakak kunup, ag amu adpa hewona, ad amu qadepa oopa ele gol

mewona, ag nug ameg am golpaib hepig amu, keeke adit amu a agupa daapid. Amu kunup amu oopa amu gol id laa, amupa ag bret onig mana inapig, aria Aronnu bu, ita beum ele amu, men otala adit, amupa do nai yaalatak ele amu, keeke amu oh kunup amu oopa daapig. <sup>5</sup> Kunup amu atan am engel adit, onilah okai ele amu, a dotolah daapid. A Kayak aben amupa daate amu danab ah ipuanadpid. A waalahpa amu hipunin uhuqa metaknu tiig gokadak aben dayom, amuam kunup ameg golpaib hak. Amge gemu amu keeke amunu oh mehuqaknu haen iita

<sup>6</sup> Aria, keeke oh anam babaitak daye amu mana metaknu danab ag haen oh lag oo makulak dimitim amupa udat ahilag hekulagnu nodapig <sup>7</sup> amge mana metak danab dilag iki, nugib am lag oo makulak oopanab amupa hipunin nuhig amu danab oh dilag ele, dod tiilagpa mana metak hekunu mad laipu oopa, haen laipuib noa hetom. Nug hamu iinab notom. Iita! Nug dod tiig awa, amu ele gotom. <sup>8</sup> Kobol amupa Kayak Oudi Nug inam ipunigte. Haen danab ag lag amupa Kayak binag mepig ele amu, danab ah oh ag Kayak noobpa tutuku wakulagnu ib iita. Ib amuam oo nak. <sup>9</sup> Mana metak lag amu nug ig gemu haen imu daatem amu keeke ipunigte. Lag amupa keeke do idu idu Kayak metanna amu mana metak idu idu ele hepig amge keeke amu oh, danab hepig ele amu, oolag bapaita heeb, ag tutuku eledenab bekulagnu elele iita. <sup>10</sup> Mana metak anam amu e lanak keeke, le lanak keeke amu le laaitak kobol, ele. Do amu oh am danab bedulagnuib. Kayak Nug do amu oh danab ag dim lamidpeg ukeb, dimpa

Nug edua keeke oh elele medakunu heum.

*KRISTUS NUG NUKA NUG TIIGPA HIPUNIN UHUQA MEGTE*

<sup>11</sup> Anam dayom amge Kristus Nug ititak ena diigdiig, Kayak megakunu dab mete ele amu, Nug amunu mana metak danab dilag iki daakunu u<sub>di</sub>a dayom. Amu Nug mana metak lag eledenab, mana metak lag tatamnu editak amu, u<sub>dat</sub> nuhig hekunu oopa noum. Mana metak lag amu danab ag epelagpa ii hepig, amu ele wan imupan keeke iita. <sup>12</sup> Kristus Nug meme tiig amu bulmakau tiig ele awa, mana metak lag amunu Gunnab Abenpa ii noum. Iita! Nug nuka Nug tiig awa, haen laipu aakuib Gunnab Aben amupa noa, Nug tiigpa Nug ig edua hanhannu awikom. <sup>13</sup> Am inam bia. Do alagpa danab laala Kayak noobpa bedulag u<sub>dig</sub> wak ele daapig amu, mana metaknu danab ag meme amu bulmakau dawai tiilag amu bulmakau balat manaeg, uhud meum ele amu, ag tiig uhud amu ele aon, danab dubutid ele amu qadelagpa taodeg, Kayak amegpa danab amu ag bedulagib opia awak daapig <sup>14</sup> amunu gemu ig Kristus tiigpa genab opia awaknab daagnig. Nug bedupa ehed laa iitanab, Nug Oudi bauklelele gagatagpa, Nug nuka Nug bedu, mana metak bia, Kayak metom amunu Nug tiig ig bedunigib ii ihom. Iita! Nug ig oonig ele iha amu kobol laa oh, bauklelele iita ele amu, Nug amu ele opie ukom. Anam amu ig Kayaknu u<sub>dat</sub> bauklelele amu adat auta aognig.

*KRISTUS TIIG NUG TITUANAK BAU GAGATAG QETOM*

15 Amunu Kayak Nug danab onilagpa eum ele amu, ag ititak haen ohnu ele, Kayak anuka Nug bekod madakunu nai qaka aum amu, ag amu aoglagnu, Kristus Nug tituanak baunu gamag danab daate. Kayak Nug amu madakunu elele daatenu diig am Kristus mauhom amunu danab ag tituanak alag waapa daana, ehed hepig amu mauhak amupanu ag uhuqak aoteb.

16-17 Danab nug dimpa mauhku amu doya, nug aun en nuhig aokunu dab mete amu nug nai amu udugpa ya, onig ele yeeb, danab laa ele nug anta onig yeeb am, gagatag aaku daaku. Aria danab laa oh ag tatam keeke mameg mauhom dopeg amu keeke mameg nug laa, nuhig keeke aokun yom ele amu, nug keeke aoku. Keeke mameg ii mauhom haenpa amu laa nug keeke ii aoma. Nai amuam mauhak dimpa aakuib keeke mamegnu dab mak gagatag qedte. 18 Diig amunu danab ag anuka tituanak tatamnu gagatag getaglagnu amu ag dod aqaeg mauhna, tiilag gokadtapig. 19 Tatam amu Moses nug do oh danab dooglagnu mehuqa malowa, dimpa nug bulmakau nag amu meme nag ele diia aqa, ag tiilag le ele kobolia, nug sipsip udig kokod amu ud laa onig hisop gumupa ita, amu tiig le ele amu do yaalataknu buk qadepa taod qetowa amu danab oh ele taod aqom. 20 Nug aum. “Tiig imu tituanak Kayak Nug ag dim lamidkulagnu matom ele amu gagatag qedate,” awa aum. 21 Anamib nug tiilag mana metak lag dod gadapa hak taod qedata, udat lag amupa heteb ele, amunu keeke naunau laa oh ele taod aqatom.

*KRISTUS HAEN LAIPUIB HIPUNIN UHUQA*



*MEGAKUNU MAUHOM*

<sup>22</sup> Aria do kobolpa, tiigpaib keeke oh opia awak daakunu dayom. Amu tiig ii ne amu Kayak Nug hipunin ii uhuqte. <sup>23</sup> Mana metak keeke amu, ag hab atan kobol niite dotog ipunigte ele amu, ag ib amupa opia awak bekununab dayom amge hab atannu mana metak lag genab, nug opia awak daakunu amu dod tiilag taod aqakunu elele iita. Iita, keeke laa dod tiig editaknab aakuib am elele. <sup>24</sup> Amuam Kristusnu mauhakpa beum. Kristus Nug mana metak lag, Kayak Nug laugnab dotog, danab ag epelagpa hepig ele amu, oopa ii noum. Iita! Nug hab atan apanab ukom amunu gemu Nug Kayak noobpa miag atia teum dayaya, danab ig ehanikaka daate. <sup>25</sup> Mad ohpa wan imupa mana metak danab dilag iki nug dod tiilag awa, lag oo gunnab, aben amupa qadabpa taodteb. Tiig amuam, nug tiig iita, am dod tiilag. Wan imupan mana metak danab dilag iki amu ahilag udat am anam amge Jesus Nug amubia ii heum. Iita. Nug nuka Nug bedu mana metak bia Kayak metom amu Nug kobol amu he, haen kudum hekunu ii daate, laipuib heum. <sup>26</sup> Nug laa heteb bia helo amu Nug haen kudum, Kayak dig ma, wan heum udie, gemu haen imu ele guitak awawa daalo amge anam iita. Haen nakok malele, Kristus Nug haen laipu aakuib wanpa na, hipunin uhuqkunu nuka bedu Kayak metom. <sup>27</sup> Amu danab oh ag haen laipuib mauhona, dimpa ag hetodiakpa daaglag, <sup>28</sup> amubia Kristus Nug nuka haen laipu aakuib, Nug bedu mana metak bia Kayak metowa, Nug danab kudum dilag hipunin uhuqa madaakunu heum. Nug anam

heum amu dimpa Nug baula edua udiku amge hipunin uhuqkunu iita. Nug danab ameg mena daateb ele amu edua diikunu udiku.

## 10

<sup>1</sup> Aria do nug am keeke ena, genab buti adi beku ele, amu dotogib aaku dayeye anidtem amge keeke ohnu dotog elelenab ii daate. Amu do nug mana metak idu idu anamib mad ohpa haknu ate amunu do nug danab ag gunnab abenpa nokulagnu elele daaglagnu bapaladkunu elele iita. Do nug heeb, ag tutuku elelenab ii bimana. <sup>2</sup> Amu do nug heeb, danab ah ag ena bekulagnu elele daalo amu ag mana metak baubau ii helob. Adinu? Danab ag metid heteb ele amu ag mana metak haen laipupaib opia awak bepig doolob, ag hipuninnu bedulagpa ab ele ii doolob, ag mana metak udat baula ii helob. <sup>3</sup> Amge iita. Mad ohpa mana metak amu he, ag hipunin ahilag daulagpa dote. <sup>4</sup> Adinu? Bulmakau, meme ele amu ag tiilag nug hipunin uhuqkunu elele iitanab. <sup>5</sup> Amunu haen Kristus Nug wanpa udia, Nug Kayak amegpa aum. “Ag dod aqan main na metaglagnu amu na oot ii daate amge keeke amu ag abenlag aokunu amu na da bedul imu bapaidna medame. <sup>6</sup> Ag dod kudum ahilag hipunin uhuqaknu qadabpa maiteb amge ag dod amu main na medateb amu na amunu ele oot ii hete. <sup>7</sup> Amunu da ami. ‘Kayak, da ina daatem. Anuka dahilnu nahip naipa yaapig bia amu gemu da nahip dab mak dim lamidkulnu udimi,’ ” awa aum. <sup>8</sup> Aria tatam Jesus Nug mana metak ag heteb ele amunu inam aum. “Ag dod aqan, main metaglagnu amu na oot ii daate. Ag dod

kudum hipunin ahilag uhuqaknu qadabpa main na metaglagnu amu na amunu ele oot ii hete.” Ag amu do ate amubia heteb amge Kristus Nug Kayak amunu oo ii hete awa aum. <sup>9</sup> Nug laa ele aum. “Kayak da ina daatem. Da nahip dab mak dim lamidkulnu udimi.” awa aum. Amunu Kayak Nug kobol gehanu amu heeb, gagatagnab daakunu, Nug kobol tatam dayom amu he, iita meum. <sup>10</sup> Jesus Kristus Nug Kayaknu dab mak dim lamita, haen laipu aakuib Nug nuka Nug bedu mana metak bia Kayak metom. Amupa Nug he, ig opia awak danab bemut daatem.

<sup>11</sup> Aria mana metak danab oh ag ded ohpa udat ahilagpa hipaidteb. Ag mana metak idu idu amuib haen oh heteb amge mana metak anam am hipunin uhuqaknu elele iitanab. <sup>12</sup> Amge Kristus Nug am haen laipu aakuib hipunin uhuqaknu mana metak hanhannu aaku heum. Nug anam ha, gemu amu Nug Kayak Onig Ele epeg nadiappa, amuam anuqak aben, amupa hedep neum daate. <sup>13</sup> Amu Kayak Nug keked nuhikud Nug waapa maadkunu haen amu ameg meum daate. <sup>14</sup> Nug mauhak laipupa mana metak heum amupa Nug he, danab ag Kayak he ag opia awak danab daateb ele amu, Nug he, ag tutuku elelenab daateb. Amu hanhan ele anamib daaglag. <sup>15</sup> Kayak Oudi Nug ele Jesus Nug keeke oh ihinig hipunin uhuqa megakunu ha malom ipunika, nai adit mekom. Laa am nug inam ipunigte. <sup>16</sup> “Kayak Nug aum. ‘Haen amupa da ag ele nug tituanta nai qakagnig. Da ag oolagpa ahilag dab makpa ele do dahil mekul.’ <sup>17</sup> Aria nai laa am, ‘Ag hipunin adi adi hepig ele

amu ag nob aomnanu da uhuqen madaḱul, ” awa aum. <sup>18</sup> Kayak Nug danab laanu hipunin uhuqa meṭa malom dayeb amu danab amu nug hipunin amu uhuḱḱunu mana meṭak baula heḱunu ii dab mema, aaku malak.

### *KRISTEN AG KAYAK GUMIDNA WANA GAGATAG DAYEG*

<sup>19</sup> Amunu o lailad, ig Jesus tiigpa mana meṭak lag oo gunnabpa gokunignu ib babaiṭak daate. <sup>20</sup> Jesus Nug ib bau, ib amupa ig bauklel aotem ele amu, buua meḱom. Anuḱa danab ag aben gunnabpa gokulagnu am ib kel doak dayom. Lamen naḱi laa aihak dayom ele amu, nug ib amu kel doum amge Jesus Nug mauhak nuhigpa lamen naḱi amu paṭiḱa, ib babaiṭa meḱe, ig Kayak topa gokunignu elele. <sup>21</sup> Laa ele amu ig am mana meṭak danab dilag iki ele, Nug Kayaknu danab ehanataṭa atog noadte. <sup>22</sup> Aria, ig ib ele, mana meṭak iki ele amunu ig Kayak gumidta gotu! Ao, ig oonigpa ham bupuak laa iita ele daatta, ig oonigpa genab dootta, Nug he ig bedunigpa ab iita dootta, Nug ig bedunig le opia awakpa babaiṭa male oitta, ig Nug gumiṭa watu! <sup>23</sup> Amu Kayak Nug keeke heḱunu nai qaḱa aum amu genab meu beḱu amunu ig oopa genab doyak ihinig miag atitta, keeke ena meu okunu ameg metem ele amu, ig adat auta aotu! <sup>24</sup> Amu ig lainḱad dilag, ag danab laa dilagnu oolag mauhḱunu amu kobol ena ele heḱulagnu maḱ atagnignu amu, ig amu ele dab metu! <sup>25</sup> Amu ig laala ag heteb amubia ig Kristen lainḱad ele qag mak laipu haknu kobol ii uumta. Iita. Ig qag metata, lainḱad oolag gagatag aqatu! Ig Kristusnu

ded miag doum daate anidtem amunu ig udat amu tudidta huana hetu!

<sup>26</sup> Amu ig dootta, hipunin baubau hetem dayeb amu ig hetata, ihinig hipunin uhuqaknu mana metak laa ii anidmata. <sup>27</sup> Anam dayeb amu ig Kayaknu hetodiak okai amu ab gakaadaknab, Kayaknu keked oh ewadku ele, amuib badidta ameg mekunig. <sup>28</sup> Ig dootem, danab laa nug Mosesnu do tipale, danab adit laa o danab ewam laa ag anidna, nug ehed heum amunu heeg, miag atie amu ag nuhignu oolag gai iita ii doopig. Iita! Nug aaku cepeg mauhkunuib dayom. <sup>29</sup> Aria anuka danab nug do tipalom amu ag nug cepeg mauhkunu dayom amunu gemu amu danab laa nug Kayak Beka di medte ele amu, nuhignu amu atemnab? Danab amu nug geha qagaetak nadinab anidkunu elele. Adinu? Nug Kristusnu, Nug am keeke hamu doya, Nug tiig ele, amupa Kayak nug ele nug tituanpid, amupa danab amu nug opia awak beum amge danab amu nug tiig amunu keeke hamu bia doyom. Laa ele amu nug Kayak Oudi, Nug hanhan ehanitak okai hamu megte ele amu, nuhigpa ele kobol ehednab heum. <sup>30</sup> Amunu danab ag kobol ehed amu heteb ele amu, ag epediak genab aoglag amu ig dootem. Adinu? Kayak Nug nuka Nug aum. “Ehed hak kobolnu edua nob maknu udat am dahil. Danab ag ehed heteb ele amu, da ag nob mada kul.” awa aum. Nug laa ele aum. “Nadi Nug nuka geha nuhikud danab epediadku,” awa aum. <sup>31</sup> Amu danab laa nug hipunin nuhignu, Kayak bauklel ele epegpa epediak aokunu gokunu am keeke hamu iita. Keeke amuam keeke ug naunab ele.

<sup>32</sup> Aria ag haen Kristus aopig daanna, dimpa ug okai laala ahilagpa beebe doopig ele, haen amu amelagpa doad! Haen amu ag ug kudum maoegeg, laa ag guitak okai ele madapig amge ag gagatag hipaidna daanna maopig. <sup>33</sup> Amu haen laala danab laa ag qag mak nau noolagpa ag guitak maton, aon aon aqan, ihaklel aqanna, guitak nadi ele madapig. Haen laala ag kristen ag lailkad ug anam dooglagnu bedulagpa beum amu ag lailkad ehanadna, ug amu ele maopig. <sup>34</sup> Amu ag danab mani guitakpa daapig, amu dilag oolag doyom. Amu haen laala dimitim danab ag uđin, ahilkad keeke ena ena adadna diipig amge ag amunu oolag ii nauhom. Iita, ag oolag bodo ete, uueg aopig. Adinu? Ag ahilag keeke ena hanhannu, dimpa aoglagnu apa ana daate doopig. <sup>35</sup> Amunu ag oopa genab doyak gagatag ahilag amu aib maopeg ukom. Adinu? Geha ag keeke amunu nob enanag aoglag. <sup>36</sup> Amu ag oolag madod ele gagatag hipaidna daanna, Kayak ode dim lamidna amu ag keeke ena, anuka Nug ag madakunu nai qaka aum amu, geha aoglagnu daate amunu ag gagatag daaglag am ena. <sup>37</sup> Amuam Kayak naipa nai laa daate amubia. Nai am inam. “Haen elab iita, nakoknab laa ele, danab udikunu daate amu Nug udiku. Nug am kagi ele ii hema, pahanab udikunu daate. <sup>38</sup> Tutuku danab dahilad, ag oolagpa genab dooteb ele amunu ag am geha bauklel aon daaglag. Amu laipu laa nug di medaku amu da nuhignu amu da oolpa elelenab ii dookul.” <sup>39</sup> Amge ig am danab ag Jesus di metan padal meteb ele, danab amu oolagpa ii daatem. Iita! Ig am danab ag

nuhignu oolagpa genab doon, bauklel aoteb ele amu, ag oolagpa daateb.

## 11

### *OOPA GENAB DOYAK NAI DIIGDIIG*

<sup>1</sup> Danab nug oopa genab doyak ele amu nug adi keeke aokunu ameg mete amu nug genabnab genab aokunuib dab mete, nug ii aomanu nakok laa ii dab mete. Amu ele nug keeke amegpa ii anidte ele amu, nug anamib genab anidkunu dab mete. <sup>2</sup> Amu danab anukanu, ag am oolagpa genab doopig amunu Kayak Nug ahilagnu oo ena doyaya, ahilagnu ena aum.

<sup>3</sup> Amu Kayak Nug odepa nai aawo, wan, atu, keeke oh ele bepig daateb, ag akanab ii bepig amu, ig amuam oonigpa genab dootem.

<sup>4</sup> Abel nug Kayaknu oopa genab doyom amunu nug mana metak, Kain editak, mana metak enanag heum amu Kayak nuhig mana metaknu amu enanag anta nuhignu, “Danab tutuku,” awa aum. Abel nug am anuka mauhom amge nuhig oopa genab doyak amu ig adi hekunignu gemu ele ig ipunika auta aote.

<sup>5</sup> Amu Inok nug ele am Kayaknu oopa genab doyom amunu nug am ii mauhom. Iita, Nug bau dayaya, Kayak topa waum. Kayak Nug nuka awom amunu laa ag nug iinab anidpig. Inok hab atan ii ukom haenpa tatam Kayak Nug nuhignu oo ena dayom amu Nug he, amu miag atiom. <sup>6</sup> Danab laipu laa nug oopa genab ii doote ele amu Kayak Nug nuhignu oo ena dookunu elele iita. Adinu? Danab ag nuhigpa wakulagnu amu ag, “Kayak Nug

daate amu danab ag Nug matin oiteb ele amu, Nug ag nob ena madaku,” oolagpa genab dooglagnab. Ib laa iita.

<sup>7</sup>Noa nug Kayaknu oopa genab doyom, nuhignu ele enanag doya, oo ele otaiom amunu Kayak Nug dimpa kobol bekunu a amu Nug ode doyom. Noa nug Kayak nainu oopa genab doyom amunu nug baekudpa ele oh ag bau daaglagnu nug aaku ub itom. Oopa genab doyak nuhig amupa amu nug danab laa oh, ag oolagpa genab ii doopig ele amu, ag ehed hepig aaku ipuanata, amupa ele nug am danab tutuku beum.

<sup>8</sup>Abraham nug ele Kayaknu oopa genab doyom amunu nug Kayak ode dim lamita, Kayak Nug wan atu laa medakunu aum amupa ukom. Amu nug apag diagnab uua aha, ab atenpanab uka daakunu am nug oo ii maitete ukom. <sup>9</sup>Amu nug Kayaknu oopa genab doya uka, wan Kayak medakunu nai qaka aum amu atu amupa danab laa atu laiynu udia daate bia dayom. Amu nug dod gadapa lag ha amupaib daatom. Aria nug beka Isak amu nug alag Jakop ele, a nug budub amu, Kayak Abraham amegpa keeke medakunu nai qaka aum ele amu, a nai amu ele aopid. Amu a ele wan amupa dod gadapa lag anen anen heya, amupaib wan amupa daadtapid. <sup>10</sup>Abraham nug ab okai laa, Kayak dab ma heum, ab amuam hanhan daaku ele amu, ab amupa daakunu ameg ma dayom amunu nug wan amupa dod gadapa lag hak amupa daakunu ug ii doyom.

<sup>11</sup>Sara nug am ah matoi, nug kainonab ele meum amge Kayak Nug nug nid menukunu nai



qaka a, Sara nug Kayaknu oopa genab doyom amunu Kayak he, Sara nug nid menukunu elele dayom <sup>12</sup> amunu danab laipu amu nuhigpa danab apatna, wan atu oh am bepig daateb. Nug am mauhom bia dayom amge nug budub ag gemu eb qaknu elele iita daateb. Amu hodopai atannu bia amu yu ihipa abud bia wan atu oh am bena daateb.

<sup>13</sup> Danab amu oh ag ahilag oopa genab doyak amuib adan mauhpig. Ag Kayak keeke madakunu nai qaka aum, nai amuib aopig daanna mauhpig, keeke amu ii aopig amge buti adi keeke amuam bekunu genab anidpig. Ag am doopig, wan imu am ag apalag diignab iita, ag am laihamu udiin daateb bia daapig. <sup>14</sup> Danab ag aka ahilagnu anam dooteb ele amu, ag amupa miag atiak ipunigteb. Ag apalag diignab anidkulagnu neegna daateb. <sup>15</sup> Ag wan imupan apalag tatamnu uun Kanan wanpa udipig ele, amun ii dab mepig. Ag anam dab melob amu ag edun gokulagnu elele daalob <sup>16</sup> amge anam am iita. Ag apalag ena dimpanu, hab atan amunuib dab mepig amunu Kayak Nug, “Da ahilag Kayak,” akunu amu uda ii nete. Iita, Nug ab enanag, ag daaglagnu babaitom daate.

<sup>17-19</sup> Abraham nug Kayaknu oopa genab doyom amunu haen Kayak Nug Abraham diig dookunu ug metom, haen amupa Abraham nug beka mana, Kayak medakunu keeke oh babaita dayom. Dayeye, Kayak he, nug beka ii ceum amge Kayak Nug Abraham amu oh helo bia doyom. Tatam Kayak Nug Abraham amegpa Isaknu inam aum. “Isak budub aakuib ag na budunadnab daaglag,” awa aum. Yo, Kayak anam a, Abraham nuhig nai amu

awom amge dimpa nug Kayak ode dim lamidkunu, Isak mana, Kayak medakunu keeke oh babaitom. Adinu? Abraham nug anam hekunu haaha, nug Kayaknu inam dab meum. “Da bekal mauha, edua hipaidkunu amu Kayak Nug amu hekunu elele.” Nug anam dab ma, keeke oh Isak mana, Kayak medakunu babaita mala dayom amunu ig inam akunignu elele. “Abraham nug beka mauhak abenpanu edua awom,” aot akunig.

<sup>20</sup> Isak nug Kayaknu oopa genab doyom amunu dimpa ahilahpa adi keeke bekunu amu nug Jakop Esau ele ititak matom.

<sup>21</sup> Jakop nug Kayaknu oopa genab doyom amunu nug mauhkunu haen miag dayeye, nug Josep bekod adit ititak matom. Nug amu dud qaknu hokat nuhig iki ade ehanite dayaya, Kayak binag meum.

<sup>22</sup> Josep nug Kayaknu oopa genab doyom amunu haen nug mauhkunu haaha amu nug Israel ag dimpa Igipta uun, ahan gokulagnu anana amu, nug beđu ațem boomkulagnu ele aum.

<sup>23</sup> Moses anig mameg ele a ele Kayaknu oolahpa genab doopid amunu anig nug Moses menue, nid enanag anidya, kalam ewam lokumeh niitom. A Paronu oolah ii badeđe hepid.

<sup>24</sup> Moses nug Kayaknu oopa genab doyom amunu haen nug okai ma dayom ele amu, nug ag, “Nug am Paro adeg beka,” akulagnu oo ii dayom.

<sup>25</sup> Iita, nug amu uua, amu Kayaknu danab ah ele ag oh ug laipu maoglagnu oo dayom. Nug hipunin kobol dim lamita oiyaya, oo gamag ahak haen tutunuib aokunu amu nug oo ii niiom. <sup>26</sup> Nug nob ena, buti adi Kayak medaku amunuib dab

meum amunu nug Kristus onigpa u<sub>da</sub> nak aokunu ena doya, Igipta dilag enubnu amu, nug keeke hamu doyom. <sup>27</sup> Moses nug Kayaknu oopa genab doyom amunu nug Igipta wan uua, a<sub>ha</sub> ukom. Nug Paronu opodi bak amunu oo ii badom. Amu danab ag Kayak amelagpa anidkulagnu elele iita amge Moses nug antom bia dayaya, nug gagatag dayom. <sup>28</sup> Moses nug Kayaknu oopa genab doyom amunu nug Igipta uua ii ukak haenpa nug Israel ag anam hekulagnu aum amunu Nug Israel ele ag Pasowa metid hobul hena, ag sipsip tiilag laulkad od ugupa taud qedapig. Ag dod tiilagpa anam hepeg, nid tatamnu menuatak aqaknu engel amu nug ag gukuata ii wamanu heum.

<sup>29</sup> Israel danab ag Kayaknu oolagpa genab doopig amunu ag le kokod wan qada etakpa oitem, amubia matadna laih wapig. Amge Igipta ag anam hekulagnu heegeg, le tonate, ag oh mauhpig.

<sup>30</sup> Israel ag Kayaknu oolagpa genab doopig amunu ag Jeriko ab taliliak men ad nadi haen eblaih adit ele talilidna oiyegeg, men ad nadi pana, na qeum.

<sup>31</sup> Rahab, nug am ib baag ah, nug Kayak adi hekunu aum doya amu nug Kayaknu oopa genab doyom amunu do danab adit laa, ab italaknu udipid ele amu, nug ahilahnu madod doya, a ehanatom amunu nug padal mak ehed hak danab ag aopig ele amu, nug amupa padal ii meum.

<sup>32</sup> Amu oh ag anam hepig amunu gemu am da adi nai laa tudite madikul. Amu da Gidionnu kaya, Bereknu kaya, Samsonnu kaya, Jeptanu kaya, Dawitnu kaya, Samuelnu kaya amu propet dilag kaya ele madikulnu elele amge haen iita.

<sup>33</sup> Danab amu ag Kayaknu oolagpa genab doopig amunu ag ban edidna, wan imupan gumak danab daanna, kobol nau kudum tapalateg nopig. Ag am Kayak keeke madakunu nai qaka aum amu aopig. Amu ag laion odelag qamutpig. <sup>34</sup> Amu ag heeg, ab nau qauhom. Ag am qep aeg hawad ele aqamanu dekadpig. Ag gai iita daapig amge dimpa ag gagatag aopig. Ag ban danab gagatag bena amu ag ab laalapanu ban daup lamateg gopig. <sup>35</sup> Aria danab ag oolagpa genab doopig ele amu ag heeg, danab laala mauhpig ele amu, ag edun, hipaidna, ag waalkad ele baula daapig. Amu laa ag oolagpa genab doopig ele amu, ag oolagpa laala ag qagaetakpa daaegeg, keked ahilkad ag ehednab hadnana, bedulag heeg nauha auta awom amge ag Kayak di medapeg, keked uadpeg gokulag nu dab ii mepig, keked odelag ele ii dim lamidpig. Ag am mauhna, dimpa edun hipaidna, bauklel aoglag amunuib dab mepig. <sup>36</sup> Oopa genab doyak danab laala amu keked ahilkad ag kalemlem aqanna, laala ag bu aqanna amu laala mudig gagatagpa hipaladna, mani guitakpa ele maateg daapig. <sup>37</sup> Oopa genab doyak danab laala amu ahilkad keked ag menpa makudateg mauhpig. Laala amu ag hahpa bedulag otadateg ne, mauhpig. Laala amu qep aeg hawad elepa aqaeg mauhpig. Keket ag oopa genab doyak danab amu ehed hateg, ag lamen ena iita takan, ag keekenu ele daddek daapig. <sup>38</sup> Ag laala ag matatun gona, atu tadakpa, danab apa iita elepa oiyegeg, laala ag gona, qaukopa oiyegeg, laala ag men odepa ele daapig. Wan imupan danab nau ag am oopa

genab doyak danab amu ele elele iitanab.

<sup>39</sup> Oopa genab doyak danab amu ag Kayaknu oolagpa genab doon, ag Kayak noobpa onig ena aopig amge ag aka Kayak keeke ena madakunu aum am ag haen amupanab ii aopig. <sup>40</sup> Adinu? Kayak Nug ag haen Nug tituanom ele amu haen amu ameg mebepeg, Jesus udieb, geha ag ig ele oh elelenab megakunu dab meum.

## 12

### *JESUS DIM LAMITAKNU NAI*

<sup>1</sup> Aria ihinignu amu ig anukanu danab kudumnab ag ig oopa genab doyak kobol ipunikeg anidtem amunu ig oopa genab doyak ipu tutuku dim lamidtu! Ig danab laa ag nug edid edid qai etan goteb ele amu, ag keeke oh bedulag ug medate ele, ag amu budieg uke, qai etan goteb amubia ig adi keeke, ig amu adat oopa genab doyaknu ipu tutuku ii dim lamidkunig amu ig keeke amu budiput ukeb, ig adi hipunin, nug ig bedunigpa ta adai kom daate ele amu, ig amu ele qeput, na ukeb, ig Kayak Nug ipunig mekom amu amupa bahi yak ele iitapa qai etat gotu! <sup>2</sup> Amu ig amenig ukeb, Jesus, Nug am oopa genab doyaknu diig daate, Nug oopa genab doyak ihinig elelenab medaku diig ele amu, ig Nug anidtu! Jesus Nug anuka oo gamag ahak geha dimpa anidkunu dab meum amunu Nug gaga tag dayaya, ad emaitakpa ug doyaya, guitak awa mauhom. Ad emaitakpa mauhaknu amu u danak ele amge Nug dimpa oo gamag ahak okai aokunu dab maama, u danak amunu dab ii meum, am keeke hamu bia doyom. Gemu amu Nug

hab atan, Kayak epeg nadiappa, amuam anuqak aben, amupa daate. <sup>3</sup> Ag Jesus adi ipunigte am anteg! Hipunin danab anuka ag Jesus keked okai medapig amge Nug gagatagnab dayom. Ag gemu oolagpa genab dooteb amu ag keeke amu dab mena, ag ele aib bahilag yom amu ag ebehilag ele aib bodo etom.

<sup>4</sup> Ag am hipunin qepeg nekunu ban hepig amge ban amupa ag tiilag ii neum. <sup>5</sup> Ag oolag gagatag qedakunu Kayak Nug nai laa aum amu ag nai amu ag daulag atiomtai? Nug nai amupa ahilagnu amu Nug bekod doyaya aum. Nai amuam inam. “O Nid dahil, Nadi Nug na ena bekutnu toliṭa, bu niṭeb amu na amunu keeke hamu bia aib doome. Nug na ena bekutnu daut bateb amu na oot aib nauhom. <sup>6</sup> Adinu? Nadi Nug danab laanu oo mauhte amu Nug danab amu ena daakunu toliṭa, bu qeṭe. Nug danab laa awa, nuhignu, “Nid dahil,” aṭe ele amu, Nug danab amu ena bekunu guitak nakok medṭe.”

<sup>7</sup> Nai anam daate amunu Kayak ag ena bekulagnu ug madate amu ag anen anen haen amupa, “Kayak ehanidṭe,” doona, gagatag dayeg! Kayak Nug ahilagnu, Nug bekodnab doyata atog noadṭe. Danab aun laa nug nid nuhig, nug ena bekunu, ii toliṭa, bu ele ii qeṭe? Laa iṭa. <sup>8</sup> Danab ag nid ahilkad ena bekulagnu toliadna, bu aqateb amunu Kayak Nug ag oolagpa genab dooteb ele ag ii toliata, bu ele ii aqate ele dayeb amu ag Nug bekodnab iṭa, ag am ib imuagnu nid bia daateb. <sup>9</sup> Amu ag imu ele anteg! Ig mamenkad wan imupanu amu ag ig ena bekunignu toliga, bu iqaeg, ig ag binalag meṭem. Anam amunu ig Mamenig hab atan daate ele amu, ig Nug

waapanab daatu! Ig anam daatta, bauklel aognig. <sup>10</sup> Ig mamenkad, wan imupanu amu, ag ig ena beku<sup>n</sup>ignu amu haen tutuib, ag oolag anam daate ele, amu dim lamidna toligna, bu iqapig amge Kayak Nug ig ehanig<sup>k</sup>unu, Nug opia awak daate, ig ele amubia daagnignu tolika, bu iqate. <sup>11</sup> Danab nug ena be<sup>k</sup>unu toli<sup>t</sup>a, bu qak aote ele amu haen nug aote amu danab amu nug oo gamag ii aha<sup>t</sup>e. Ii<sup>t</sup>a. Nug oopa guitak doote amge Kayak Nug danab amu nug ena be<sup>k</sup>unu udat amu ha male amu danab aun nug toli<sup>t</sup>a, bu qak amu pehetak aote ele amu, nug tutuku oiyaya, madod ele daate.

<sup>12</sup> Amunu ag Kayaknu toli<sup>t</sup>a bu qak aoglag amu ag oolag aib nauhom. Ii<sup>t</sup>a. Ag danab nug epegte ii<sup>t</sup>a nug gategte gai ii<sup>t</sup>a meum, gagatag qedte amubia ag aka gagatag aqeg! <sup>13</sup> Amu ag oolagpa laa ag baelag nau ele amu ag nauhna autna aomnanu, ag edun ena daaglagnu, ag ib tapan goteb ele amu, ag bapaidna autna aweg!

### *DAB METAKNU NAI*

<sup>14</sup> Amu ag danab laala ele ag oh madod ele daanna oiglagnu udat gagatag henana, ag opia awak kobolpa daaglagnu ele wagai meig! Adinu? Danab laa nug opia awak ii<sup>t</sup>a ele amu nug Nadi anid<sup>k</sup>unu elele ii<sup>t</sup>a. <sup>15</sup> Danab laa nug Kayaknu ehanitak okai hamu megte ele amu di meta na qemanu dab meig! Ag oolagpa danab laa nug ad laa tiig mua ele, danab lanana mauhte<sup>b</sup> ele, amubia dayaya, nug heeb, ag Kayak amegpa dubutid ele daamnanu ele dab mena autna aweg! <sup>16</sup> Danab laa nug gapai kobol dim lamidmanu amu laa nug Esau, nug Kayaknu ii dab maama oitom, nug

nid danab menuak tatamnu ititak amunu hamu doya, Jakop nug e nakoknab, geha iikunuib meteb, nug ititak amu Jakop medakunu a mete laum ele amu, laa nug Esau bia oimanu ele dab meig! <sup>17</sup> Adinu? Ag dooteb dimpa Esau nug Isak epegpa ititak aokunu heum amge nug elele iita dayom. Esau nug ititak aokunu gayak huana heum amge nug ib nakoknab laa ii antom.

### *TITUANAK ADIT DILAH NAI*

<sup>18</sup> Israel ag anuka Sinai qauko, qauko amuam danab nug ada dookunu elele, qauko amupa ab nadi ewa ditieye amu ag qauko amu gumidna wapig. Ag qauko amupa gatatu tepu ele dayeye wapig. Ag qauko amupa ulah nadinab udieye wapig. <sup>19</sup> Ag qauko amupa biugal baag okai gayeye doonna wapig. Ag qauko amupa Kayak baag doon, ag badana Moses amegpa inam apig. “Ig baula baag amu doyak uumut,” aon apig. <sup>20</sup> Haen amupa ag Kayak nai matom amunu badan autna aopig. Nug nai inam aum. “Danab laa nug epeg bahia qauko imu adeb amu ag menpa makudpeg mauhad! Dod ag ele qauko imu laudidpeg amu aqapeg mauheg!” awa aum. <sup>21</sup> Yo, Israel danab ag keeke amu anidna, oolag huana badom. Amu Moses nug ele aum. “Da baden hahadtem,” awa aum. Israel ag keeke amu oh gumidna wapig.

<sup>22</sup> Amge ag gemu daateb, ag am oolagpa genab dooteb ele amu, ag keeke anampa ii wapig. Iita! Ag amu Sion qaukopa tepig. Ag am Kayak apagpa, Jerusalem hab atannu, Kayak bauklelnu apagpa tepig. Ag amu engel tausen tausen qag mena, oo gamag ahak okai henan daateb ele, amupa tepig.



<sup>23</sup> Amu ag Kayak be<sub>k</sub>od tatamnu, Kayak Nug ag onilag matu awom daate, ag amu dilag qag mak nadi amupa wapig. Ag Kayak, Nug am danab oh epediadte ele amu, Nug gu<sub>k</sub>uidna wapig. Amu ag danab anu<sub>k</sub>anu, Kayak Nug ahilag<sub>n</sub>u, “Danab tutuku,” aum, ag mauhadna hab atan tutuku elelenab daateb ele amu, ag gemu daateb, ag oolagpa genab dooteb ele amu, ag amu gumadna, ahilagpa tepig. <sup>24</sup> Amu ag Jesus, Nug am gamag danab, Nug tituanak bau heum daate ele amu, ag nuhigpa wapig. Kain Abel qe mauhom, haen amupa Abel tiig neum amunu nob mak dayom amge Jesus ehanig<sub>k</sub>unu he, Nug tiig neum amu ag amupa wapig.

<sup>25</sup> Amunu ag dab meig! Ag aib daulag itun, Kayak nai madite amu nai nuhig qepeg neum. Anuka wan imupa, Sinai apa, Kayak Nug nai gagatag danab amelagpa aum amge ag nuhig nai tapaeg neum. Ag tapaeg neum amunu ag ahilag hipuninnu nob qe edidna gokulag<sub>n</sub>u elele iita daapig. Gemu Kayak Nug hab atan dayaya, nai gagatag ig megte amunu ig Nug di metata amu ig oolta hipunin ihinignu nob qe edidkunignu elelete? Iitanab! <sup>26</sup> Anuka Kayak Nug odepa nai aawo, wan udalom amge geha Nug nai qaka inam aum daate. “Da geha baula wan hepi udalku amge wanib iita, hab ele oh udalkulah,” awa aum. <sup>27</sup> Amu, “baula,” nai amu inam ipunigte. Kayak Nug anuka keeke hatom ele amu, keeke amu oh geha udalkulag. Keeke oh diignab iita ele daate amu, udalak amu heeb, iita meku, baula ii daamna. Keeke laa, diignab ele amu, keeke amu aakuib geha daaku.

<sup>28</sup> Keeke diignab ele aakuib daaku amu ig amupa

daagnignu daatem amunu ig oonig gamag ahebeb, ig amunu Kayak amegpa, “Ena hen mekame,” aot atu! Amu ig Nug binag metata, udat, kobol ele, Nug amunu oo daate amu, ig dim lamidta hetu! Ig Nug binag metata, nuhignu enanag doota, oonig ele otaiad! <sup>29</sup> Adinu? Ihinig Kayak Nug am genab, ab adu nadinab bia.

## 13

### *KAYAK OO NIITE DIM LAMITAKNU NAI*

<sup>1</sup> Ag Kayak baekudpa daateb ele amu, ag lailkad dilagnu nug oo mauhak aib uupig. <sup>2</sup> Ag do danab diin atog noadkulagnu ele aib daulag atiom. Anuka laa anam hena, Kayaknu engel diin atog noadpig amge ag am engel amu, ag oolag tutuku ii maitete atog noadpig. <sup>3</sup> Lailkad laa mani guitak oopa daateb ele amu, ag amu dilag dab menan dayeg! Ag ahilagnu dab mena, ag ele danab mani guitakpa daateb bia doona dayeg! Laa oolag ug ele dooteb amubiaib ag ele oolag ug ele bia doon dab matanna dayeg!

<sup>4</sup> Ewau dayaknu amu ag oh ena doyeg! Ewau a hanhan ewau genab daaglahnu ele ena anteg! Kayak Nug geha laa gapai aoteb ele amu epediadku. <sup>5</sup> Ag oolag men dodonu aib mauhom. Amu ag keeke adateb ele amu, ag amupa elele doyeg! Adinu? Kayak Nug aum aaku daate. “Da ag ii uuadpa, da ag ii di madapa,” awa aum. <sup>6</sup> Diig amunu ig oonigpa badak iita ele akunig. “Nadi Nug dahil ehanitak daate, da ii badapa, danab laa nug adi dahilpa laa heku? Iita.”

7 Toliak danab tatam tatam ag Kayak nai matiegeg, ag doopig amu daulagpa dayebbeb, ag dab mepeg ukeb, ag atem daanna oinna, udat henana mauhadpig amu amelagpa doobob, ag ele amubia doon, oolagpa genab doyeg! <sup>8</sup> Amu Jesus Kristus Nug atem daate amu, Nug tumai, gemu, hanhan ele anamib daate.

<sup>9</sup> Ipunitak kobol laa hanhan ahilagpa ii daate ele amu, ag anidna aib dim lamidpig. Adinu? Ig Kayaknu ehanitak okai hamu megte amupa, Nug dim lamidkunignu gagatag aognig am ena. Ig enu do kudum dim lamidta, gagatag amu aognignu hekunig am ena iita. Danab laala ag anam henan oipig amge ii ehanatom. <sup>10</sup> Aria ig kristen ele, ig am qadab laa, amuam Jesusnu ad emaitak, am mana metak danab ag dod gada laka apa udat heteb ele amu, ag apa henana, ag ihinig qadabpa ehanitak aoglagnu elele iita.

<sup>11</sup> Juda dilag mana metak danab dilag iki nug sipsip amu bulmakau ele tiilag awa, Kayak Nug danab ah dilag hipunin uhuqa madakunu lag oo gunnab amupa mana metak hete amge dod amu meulag amu ab dimitim manateg eote. <sup>12</sup> Amunu amubia Jesus Nug ele am ab okainu ad od dimitim, Nug danab dilag hipunin Nug tiigpa uhuqa mateb, opia awak daaglagnu, ug mawa mauhom. <sup>13</sup> Amunu ig ele ad dimitim nuhigpa gota, Nug udanak, ug ele awom bia aotu! <sup>14</sup> Ig dootem, wan imupa ab okai haen elab hanhan daakunu, ig apa daagnignu, laa ii daate. Amge ig am ab okai buti adi beku ele amunuib ameg metata daatem.

<sup>15</sup> Danab laa ag Kayak binag mekulagnu amu ag

dod keeke main, Nug medateb amubia ig Jesus udat nadi ihinignu heum, amupa Kayak binag metu! Ig amu hekunignu amu ig odenigpa Kayak Nug am ihinig Nadi akunig. <sup>16</sup> Amu ag lailkad dilagpa ena henana, ag lailkad keekenu tutu mak ele amu, ag nug ehanitak kobol ele hekulagnu aib daulag atiom. Adinu? Kayak Nug amunu mana metak bia doya, oo enanag daate.

<sup>17</sup> Ag tamaniak oopa daateb ele amu, ag ahilkad toliak waalagpa daanna, ahilag nai ele dim lamidkulag. Toliak ag ehanadkulagnu hena, hanhan ag atog noadnana udat heteb amu, toliak ag amunu geha Kayak amegpa mehuqkulag amunu toliak ag ug doomnanu, ag oolag gamag ahakunu amu ag laa ag ag waalagpa daanna, ahilag nai dim lamiteg! Tamaniak danab ah ag ug doonna, toliak dilag nai dim lamidkulag dayeb amu ag kobol amupa ehanitak ena ii aomna.

<sup>18</sup> Ig oonig am Kayak amegpa tutukuib daate amu oonigpa genab dootem, ig haen oh tutukuib oignignu oonig daate amunu ag Kayak ig ehanigkunu unuqiteg! <sup>19</sup> Dahilnu ele amu ag Kayak da ehanideb, da edue paha ahilagpa gokulnu Nug unuqidkulagnu ag unuqadtem.

### UNUQITAK LAA

<sup>20-21</sup> Aria Kayak, Nug am madod diig daate amu, Nug he, ihinig Nadi Jesus Nug mauhak oolagpanu edua hibaitom. Jesus tiig ne mauhom, amupa Nug, nug tituana nai qakak bau hanhannu gagatag qetom ele amu, Kayak Nug Jesus tiig amupa heeb, keeke ena oh ag nuhig dab mak dim lamidkulagnu elele daaglagnu ahilagpa dayeb, Nug ihinigpa adi

hekunu oo daate amu hekunu ool daate. Jesus Nug am ihinig gumak danab anuqak okai daate. Ig hanhan Nug binag metu! Genab!

***BAG QAK NAI***

<sup>22</sup> O lailad, udug imu tutuib yaami amunu ag daulag human, oolag gagatag qedakunu nai gagatag yaami imu, ag dooglagnu od madatem.

<sup>23</sup> Amu ele ag dooglag, ig lainig Timotius amu ag nug mani guitakpanu uhugeg doum daate. Nug ipa haen elelepa udieb amu i oh geha ag gumadda gokunih. <sup>24</sup> Amu ag ihinig humitak nai ahilkad toliak oh matanna amu Kayaknu danab ah oh ele mateg! Amu Kayak baekudpan danab Italinu amu ag humitak nai ahilagpa meeg gote.

<sup>25</sup> Kayaknu ehanitak okai hamu megte amu, ag oh ahilagpa dayad!

**KAYAKNU NAI Tituanak Bau**  
**The New Testament in the Nobonob Language of**  
**Papua New Guinea**  
**Nupela Testamen long tokples Nobonob long Niugini**  
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 21 Feb 2024 from source files dated 31 Aug 2023

ed374bb9-d819-53d1-a85b-f86cce3892e1